

每週經課朗誦經文(巴克禮漢羅/教羅)2014/05/25

共同經課 - 1 使徒行傳十七章二十二節~三十一節

22 保羅 khiā tī A-liók 山中，講， 雅典人 ah，我看 lín 凡事敬畏神明，嶄然熱心。23 因為我 teh 行遊 ê 時，看見 lín 所敬拜 ê， tú-tiòh 一座壇，頂面寫，講，未 bat ê 上帝。Lín 所未 bat 來敬拜 ê，我用伊來 kā lín 講。24 Hit-ê 創造世間 kap 其中萬物 ê 上帝，既然是天地 ê 主，無 khiā 起手造 ê 殿；25 無 hō 人 ê 手服事，ná 親像伊有所欠缺；是家己用活命、喘氣，kap 萬物 hō 眾人；26 koh 創造萬邦 ê 人，tùi 一個本源，khiā 起 tī 全地面，koh kā in 限事先定 tiòh ê 時期，kap 所 khiā 起 ê 地界；27 是 beh hō in chhē 上帝，kiám-chhái thang 揣摩來得 tiòh，其實伊離開咱 tak 人無遠。28 因為咱 tiàm-tī 伊來活，來振動，來 tī-teh；親像 lín 中間做詩 ê 人有 ê 有講，因為咱 chiah-ê 亦是伊 ê kiáⁿ 類。29 Taⁿ 既然是上帝 ê kiáⁿ 類，就 m̄ 應該掠做上帝 ê 本質親像金、銀、石，人 ê 工夫人 ê 心事所雕琢 ê。30 Hiah-ê m̄ 知影 ê 時代，上帝無窮勘；taⁿ 就命令 tak 所在 ê 人 lóng 總 tiòh 反悔：31 因為有定 tiòh 一日，beh 用伊所設立 ê 人，照公義審判天下；是 tùi 死人中 hō 伊 koh 活，hō 眾人有憑據 thang 信。

共同經課 - 2 詩篇六十六篇八節~二十節

8 萬百姓 ah，lín tiòh o-ló 阮 ê 上帝；Hō 人聽見 o-ló 伊 ê 聲。9 伊 hō 阮 ê 性命活 teh；亦無 hō 阮 ê 腳搖動。10 上帝 ah，你 bat 試驗阮；鍛鍊阮親像鍛鍊銀一樣。11 你 hō 阮入羅網；用重擔 hē tī 阮 ê 身上。12 你 hō 人坐車，poāⁿ 過阮 ê 頭殼；阮經過水火。總是你 hō 阮到富有 ê 所在。13 我 beh 用燒祭進入你 ê 厝；我 beh tùi 你謝我 ê 願，14 就是 tī 我患難 ê 時，我 ê 嘴唇所講 ê，我 ê 嘴所 hē ê 願。15 我 beh 用肥 ê cheng-siⁿ ê 燒祭，Kap kang-羊 ê 芳味，獻 hō 你；Koh 用公 ê 牛，公 ê 山羊，來獻。[Sè-láh]16 凡若敬畏上帝 ê 人，lín lóng tiòh 來聽；我 beh 講起伊為我所行 ê 事。17 我 bat 用我 ê 嘴求叫伊；用我 ê 舌 o-ló 伊做高。18 我若心內注重罪惡，主的確無 beh 聽；19 總是上帝實在有聽見；已經 à 落聽我祈禱 ê 聲。20 上帝是應該 o-ló-ê，伊 bē-bat 推辭我 ê 祈禱，亦 bē-bat hō 伊 ê 慈愛離開我。

共同經課 - 3 彼得前書三章十三節~二十二節

13 Lín 若為 tiòh 好來熱心，chī-chhui 會害 lín？14 總是 lín 若因為義來受苦，就有福氣；莫得驚 in ê 威風，也莫得孽腹；15 獨獨 lín 心內 tiòh 掠基督做主，尊伊做聖；見若有人問 lín 所 òng 望 ê 因由，就 tiòh 不時便使用溫柔 kap 驚畏來分訴；16 tiòh 存無 thang 責備 ê 良心；chiah lín tī tá-lòh 一項事受譏謗，就 tī hit 項事會 hō hiah-ê 誣賴 lín tiàm-tī 基督 ê 好品行 ê，家己受見笑。17 因為上帝 ê 旨意若 ài án-ni，就 lín 行好來受苦，比行 pháiⁿ 來受苦，khah 好。18 因為基督也一 pái 為 tiòh 罪受苦，義 ê 替不義 ê，是 beh choā 咱到 tī 上帝；論肉體就受死，論神就得活；19 tī hit-ê 神也 bat 去傳道理 hō 監內 hiah-ê 神，20 就是早 m̄ 信 thàn ê，當上帝吞忍 thèng 候，tī 挪亞 ê 日，teh 備辦大船 ê 時，人 hit 內面 ê 人少少，只有八個，tùi 水得救；21 chit-ê 所關照 ê 洗禮 taⁿ 也救 lín，m̄ 是除去肉體 ê lâ-sâm，就是無 thang 責備 ê 良心 òng 上帝來求，是 tùi 耶穌基督 ê koh 活；22 伊已經去天裡，taⁿ tī 上帝大 pêng；chiah-ê 天使，kap 有權柄 ê，有氣力 ê，降服伊。

共同經課 - 4 約翰福音十四章十五節~二十一節

15 Lín 若疼我，就 beh 守我 ê 命令。16 我亦 beh 對父求，就伊 beh 用 koh 一個保惠師 hō lín，hō 伊永遠 kap lín toà；17 就是真理 ê 神；世間所 boē 接納 ê，因為無看見伊，koh m̄-bat 伊；獨獨 lín bat 伊；因為伊 kap lín saⁿ-kap toà，koh beh tiàm-tī lín。18 我無 beh 放 lín 做無父 ê kiáⁿ；我來就近 lín。19 Iáu tiap-á 久，世間無 koh 看見我；獨獨 lín 看見我；因為我活，lín 亦活。20 Hit 日 lín beh 知我 tiàm-tī 我 ê 父，lín tiàm-tī 我，我 tiàm-tī lín。21 有我 ê 命令，koh 守伊 ê 人，chit-ê 就是疼我；疼我 ê 人，beh 得 tiòh 我 ê 父疼伊，我亦 beh 疼伊，koh 將本身顯明 tī 伊。